



戎政典第十二卷

戎政總部藝文四

長慶元年德音

唐元稹

門下朕嘗讀元元書至於佳兵者是樂殺人因念自孩名之逮於羈州不三十年不能爲成人豈忍以一朝之忿驅而殺之然而田弘正首以六州之衆歸於朝廷開先帝之雄圖變河朔之舊俗除去苛暴昭宣惠和愛人如身養士如子拊循教訓必以忠孝爲先是以魏之師徒一年而知恩二年而知禮三年而相與讓於道矣故南征淮蔡東伐青齊北定趙地元勳茂績皆自魏師肆我憲宗付之心膂入則輔弼出則藩宣推誠不疑近實無比顧朕小子獲受丕圖嗣守不遑何暇恢復而承元請覲冀部擇才苟非勳賢不敢輕授是用咨我元老臨於是邦而又寵諸將以懋官加三軍以厚賜復其租入惠彼蒸黎於此一方之人可謂無有不至而臯音未革狼顧猶存忍害忠良恣爲殘賊臨軒震悼撫几驚嗟天乎不仁一至於此朕下爲君父上奉祖宗毀舟楫於鯨鯢陷股肱於蛇豕尙欲因循忍恥俛首偷安非惟傷心於田氏之子孫亦將何顏謁先帝之陵廟人神共憤卿士叶謀咸願誅

夷用申冤痛便合興師進討以翦姦兇尙念一軍之中豈無義勇倉卒變動必非衆謀苟得其魁餘復何罪宜令魏博橫海昭義河東義武等軍各出全軍以臨界首仍各飛書檄具諭朝旨如王庭湊能執首謀爲亂扇動三軍者送付鄰道或就鎮州處置然後束身歸朝必當陞獎授三品正員官並與實封二百戶其餘三軍將士一切不問其中大將等或有能相喻勸翻然改圖者各隨事迹便當寵擢如王庭湊仍遂迷不悟諸道宜便進軍以時翦滅苟不得已至於用師其有效忠則宜懸賞如有能梟斬兇渠者先是六品以下官宜與三品正員先是五品以上官節級陞進仍與實封三百戶莊宅各一區錢二萬貫以一州歸順者便與當州刺史仍賜實封二百戶如先是本州刺史以一州歸順者陞三資與官仍賜實封三百戶以一縣歸順者陞兩資與官仍賜實封一百戶如有能率所管兵馬及以城來降者並陞三資與官仍賜爵實封一百戶賜錢一萬貫以身降者亦與轉改仍賜錢帛應付行營將士如有能梟斬兇渠者亦准前例處分其有城鎮將士百姓等守節拒賊身死王事者各委長吏優給其家仍具事蹟聞奏當加褒贈其有潛謀誅斬渠魁被其屠戮者宜便加追贈并賜錢帛仍與一子官諸軍所至不得妄加殺戮及焚燒廬舍掠奪資產并有拘執以爲俘馘其管

內州縣有能自置義營堡柵王師所至能相率來歸各加酬獎時當秋候務切農功近界之人懼廢耕織應緣軍務所須並不得干擾百姓如要車牛夫役及工匠之類並宜和雇須各情願仍優給價錢賊平之後應立功將士並與陞資改官節級賜物其長行官健歸降者亦當優厚褒賞幽陵變擾誠謂亂常以其旁及賓寮有異上品台鉉較其輕重示以招攜尙開迷復之門用廣自新之路如聞賊中文牒妄作異端皆云朝廷徵兵欲戍邊塞此皆狂詐扇動人心況今邊上甲兵人以備禦欲令悉知故重宣明仍委所在卽時以此告諭昔者堯舜之俗比屋可封虞芮之人讓畔可感仁義則水火可蹈忠信則蠻貊可行由是言之亦在化之而已逮我理長何其遠哉豈朕之滿假荒寧自聖而不可教耶將朝之魁梧骨鯁自恃而莫我念耶二者之來皆朕不敏內省終夕其心浩然於虜封域之中干戈作矣廊廟罇俎無忘弭寧布告朕懷以須良畫主者施行

進撰平蔡州碑文表

韓愈

臣某言伏奉正月十四日勅牒已收復淮西羣臣請刻石銘功明示天下爲將來法式陛下推勞臣下允其志願使臣撰平淮西碑文者聞命震駭心識顛倒是非其所任爲愧爲恐經涉旬月不敢措

手竊惟自古神聖之君既立殊功異德卓越之跡必有奇能博辯之士爲時而生持簡操筆從而寫之各有品章條貫然後帝王之美巍巍煌煌充滿天地其載於書則堯舜二典夏之禹貢殷之盤庚周之五誥於詩則元鳥長發歸美殷宗清廟臣工小大二雅周王是歌辭事相稱善并美具號以爲經列之學宮置師弟子讀而講之從始至今莫敢指斥嚮使撰次不得其人文字曖昧雖有美實其誰觀之辭跡俱亡善惡惟一然則茲事至大不可輕以屬人伏以唐至陛下再登太平剗刮羣姦灑掃疆土天之所覆莫不賓順然而淮西之功尤爲俊偉碑石所刻動流億年必得作者然後可盡能事今詞學之英所在成列儒宗文師磊落相望外之則宰相公卿郎官博士內之則翰林禁密游談侍從之臣不可一一遽數召而使之無有不可至於臣者自知最爲淺陋顧貪恩侍趨以就事叢雜乖戾律呂失次乾坤之容日月之光知其不可繪畫強顏爲之以塞詔旨罪當誅死其碑文今已撰成隨表謹錄封進無任慙惶怖懼之至

平淮西碑

前人

天以唐克肖其德聖子神孫繼繼承承於千萬年敬戒不怠全付所覆四海九州罔有內外悉主悉

臣高祖太宗既除既治高宗中睿休養生息至於元宗受報收功極熾而豐物聚地大犖牙其間肅宗代宗德祖順考以勤以容大愿適去稂莠不薶相臣將臣文恬武嬉習熟見聞以爲當然睿聖文武皇帝既受羣臣朝乃考圖數貢曰嗚呼天既付予令有家今傳次在予予不能事事其何以見於郊廟羣臣震懾奔走率又明年平夏又明年平蜀又明年平江東又明年平澤潞遂定易定致魏博貝衛澶相無不從志皇帝曰不可究武予其少息九年蔡將死蔡人立其子元濟以請不許遂燒舞陽犯葉襄城以動京都放兵四劫皇帝歷問於朝一二臣外皆曰蔡帥之不廷授於今五十年傳三姓四將其樹本堅兵利卒頑不與他等因撫而有順且無事大官臆決唱聲萬口和附并爲一談牢不可破皇帝曰維天維祖宗所以付任予者庶其在此予何敢不力況一二臣同不爲無助曰光顏汝爲陳許帥維是河東魏博鄆陽三軍之在行者汝皆將之曰重引汝故有河陽懷今益以予汝維是朔方義成陝益鳳翔延慶七軍之在行者汝皆將之曰弘汝以卒萬二千屬而子公武往討之曰文通汝守壽維是宣武淮南宣歙浙西四軍之行於壽者汝皆將之曰道古汝其觀察鄂岳曰慙汝帥唐鄧隨各以其兵進戰曰度汝長御史其往視師曰度惟汝予同汝遂相予以賞罰用命不用命

曰弘汝其以節統諸軍曰守謙汝出入左右汝惟近臣其往撫師曰度汝其往衣服飲食予士無寒無饑以旣厥事遂生蔡人賜汝節斧通天御帶衛卒三百凡茲廷臣汝擇自從惟其賢能無憚大吏庚申予其臨門送汝曰御史予閔士大夫戰甚苦自今以往非郊廟祠祀其無用樂顏引武合攻其北大戰十六得柵城縣二十三降人卒四萬道古攻其東南八戰降萬三千再入申破其外城文通戰其東十餘遇降萬二千愬入其西得賊將輒釋不殺用其策戰皆有功十二年八月丞相度至師都統弘責戰益急顏引武合戰益用命元濟盡并其衆洄曲以備十月壬申愬用所得賊將自文城因天大雪疾走百二十里用夜半到蔡破其門取元濟以獻盡得其屬人卒辛巳丞相度入蔡以皇帝命赦其人淮西平大饗資功師還之日因以其食賜蔡人凡蔡卒三萬五千其不樂爲兵願歸爲農者十九悉縱之斬元濟京師冊功弘加侍中愬爲左僕射帥山南東道顏引加司空公武以散騎常侍帥鄜坊丹延道古進大夫文通加散騎常侍丞相度朝京師道封晉國公進階金紫光祿大夫以舊官相而以其副總爲工部尙書領蔡任旣還奏羣臣請紀聖功被之金石皇帝以命臣愈臣愈再拜稽首而獻文曰唐承天命遂臣萬邦孰居近土襲盜以狂往在元宗崇極而圯河北悍驕河南

附起四聖不宥屢興師征有不能尅益戍以兵夫耕不食婦織不裳輸之以車爲卒賜糧外多失朝曠不嶽狩百隸怠官事亡其舊帝時繼位顧瞻咨嗟惟汝文武孰恤予家旣斬吳蜀旋取山東魏將首義六州降從淮蔡不順自以爲強提兵叫譴欲事故常始命討之遂連姦鄰陰遣刺客來賊相臣方戰未利內驚京師羣公上言莫若惠來帝爲不聞與神爲謀乃相同德以訖天誅乃勅顏引懇武古通咸統於弘各奏爾功三方分攻五萬其師大軍北乘厥數倍之嘗兵洄曲軍士蠢蠢旣翦凌雲蔡卒大窘勝之邵陵鄢城來降自夏入秋復屯相望兵頓不礪告功不時帝哀征夫命相往釐士飽而歌馬騰於槽試之新城賊遇敗逃盡抽其有聚以防我西師躍入道無留者頌頌蔡城其疆千里旣入而有莫不順俟帝有恩言相度來宣誅止其魁釋其下人蔡之卒夫投甲呼舞蔡之婦女迎門笑語蔡人告饑船粟往哺蔡人告寒詔賜繒布始時蔡人禁不往來今相從戲里門夜開始時蔡人進戰退戮今旣而起左殮右粥爲之擇人以收餘德選吏賜牛教而不稅蔡人有言始迷不知今乃大覺羞前之爲蔡人有言天子明聖不順族誅順保性命汝不吾信視此蔡方孰爲不順往斧其吭凡叛有數聲勢相倚吾強不支汝弱奚恃其告而長及汝父兄奔走偕來同我太平淮蔡爲亂天子

伐之既伐而饑天子活之始議伐蔡卿士莫隨既伐四年大小並疑不赦不疑由天子明凡此蔡功惟斷乃成既定淮蔡四裔畢來遂開明堂坐以治之

獻平淮西雅表

柳宗元

臣宗元言臣負罪竄伏違尚書箋奏十有四年聖恩寬宥命守遐壤懷印曳紱有社有人臣宗元誠感誠荷頓首頓首伏惟睿聖文武皇帝陛下天造神斷克清大憝金鼓一動萬方畢臣太平之功中興之德推校千古無所與讓因伏自忖度有方剛之力不得備戎行致死命況今已無事思報國恩獨惟文章伏見周宣王時稱中興其道彰大於後罕及然徵於詩大小雅其選徒出狩則車攻吉日命官分土則崧高韓奕南征北伐則六月采芑平淮夷則江漢常武鏗錦炳耀盪人耳目故宣王之形容與其輔佐由今望之若神人然此無他以雅故也臣伏見陛下自卽位以來平夏州夷劍南取江東定河北今又發自天衷克翦淮右而大雅不作臣誠不佞然不勝憤踊伏以朝多文臣不敢盡專數事謹撰平淮西雅二篇雖不及尹吉甫召穆公等庶施諸後代有以佐唐之光明謹昧死再拜以獻臣宗元誠恐誠懼頓首頓首謹言

平淮西碑

段文昌

夫五兵之設本以助文德而成教化故聖人不專任之其有桀驚暴邪干紀作孽道德不服則兵以威之文誥不諭則兵以靜之在禁暴除害而已自黃帝堯舜不能無誅至湯武受命武功寔盛其本之以仁義行之以弔伐惟帝與王率由茲道於戲創業之君勞而後定守文之主安而忘戰故三代之衰功在五霸未有中葉之後再安生靈前古所無歸於聖代我唐運之興也高祖太宗以仁義之兵除暴隋之亂戎功祖武百代丕承元宗嘗亦內翦姦邪外清邊境所以繼文之代協帝之明旣而禍起於微亂生於理由是髑髀之衆結固於兩河斤斧不用綿歷於五紀肅宗代宗親翦大憝且務生育德宗順宗觀於天象察於人事以理運未至沴氣猶凝運啟昇平以俟後聖惟我后握樞出震端宸嚮明考上元之心思祖宗之意掃滌區宇光啟帝圖不以萬乘爲尊四海爲富遵大禹櫛風之志有光武乙夜之勤以爲景擒七國而漢氏安成翦三監而周化洽焉有患難未去而德教可興日者李琳恃近狄之固劉闢憑坤維之險李錡保長江之衝從史資太行之阻四兇相挺繼爲亂常三數年間盡膏鈇鑕太尉茂昭以中山之地盡室來朝司空弘正以全魏之邦舉宗向闕義風所激莫

不歸心況彭城從折簡之召橫海展執珪之覲向之談虞虢之存亡議輔車之形勢莫不刳心斷臂  
繼踵爲忠旣而麟見於巴賈之間河清於鄜衛之際固本根之貺昭聖祚之符廓清寰海兆於此矣  
而長淮右地連山四起控扼吳楚密邇輶轅有上帝濯龍之池同冀方多馬之國戈鋌雪照駟駿雲  
屯二姓三兇憑阻作孽歲在甲午吳少誠積禍而斃餘殃聚於逆嗣氛祲淮瀆我后方弔人省冤壘  
災除穢猶命使者持節往申寵賻以昭柔服之義示含弘之仁元濟刼衆拒境滔天肆逆剽葉縣燒  
舞陽侵襄城伊洛之間騷然震恐乃詢廷議咸願假以墨綬授以兵符天子淵默以思靈馳以斷獨  
發宸慮不詢衆謀漢宣從屯田之議晉武決平吳之計至聖不惑羣疑自消於是會鳧藻之師得鸞  
揚之佐以忠武軍帥李光顏往者平朔邊靜庸蜀雙矛電激孤劍颯馳亦猶馮異之總軍鋒子顏之  
將突騎才氣雄武可掃櫬槍總魏博河陽郃陽凡三軍自臨潁而前以河陽軍帥烏重引當從史內  
詠邪謀外阻兵勢精誠奮發密應王師故得虜魏豹於軍中縛呂布於麾下識慮中正可革臬音益  
以汝海之地總朔方義成陝號劍南西川鳳翔延州寧慶凡七軍由襄陽而進宣武帥韓弘請以子  
公武領精卒一萬二千時集洄曲樂書作帥鍼爲戎右充國討鹵印統支軍是能從帥之命成父之

志又以壽春守李文通夙精戎韜累習軍旅明於守備可保金湯總宣武淮南宣歙浙西徐泗凡五軍扼固始之險以鄂岳都團練使李道古以先曹王皇有任城之武昔征兇渠嘗取安陸授以戎柄嗣其家聲乘五關之隘以唐鄧隨帥李愬溫敏能斷靜深有謀昔趙孟慕成季之勳復能霸晉亞夫紹絳侯之武亦克擒吳想其英徽必有以似山南東道荆南凡兩軍自文成而東乃命御史中丞裴度布挾纘之恩奉如絲之命以諭羣帥以撫輿師且以古之會兵必謀元帥令歸於一勢不欲分命宣武軍帥韓弘爲諸道行營都統假陸遜之鉞拜韓信之壇指縱畫奇正之機發號申嚴凝之令然後有司馬之法成節制之師而寒暑再罹賊巢未下又命內掌樞密之臣梁守謙肅將天威盡護諸將懸白日於千里推赤心於萬人由是甘寧奮升城之勇君文勵擊郢之志焚上蔡以翦其翼拔郢城以扼其吭以軒后攻蚩尤之城殷宗伐鬼方之罪周公誅淮夷之叛雖以聖討逆皆三年後定百辟之議且謂久勞將決其機以安海內復命丞相裴度擁淮蔡之節撫將帥之臣分鄧禹之麾旆盛寶憲之幕府四牡業業于藩于宣先是光顏重引公武戎旅同心壘垣齊列常蛇之勢首尾相從塞騎之雄紛紜縱擊逐餘孽如鳥雀獵殘寇似狐狸干矛如林行次於洄曲丞相之來也羣帥之志氣

逾厲統制之號令益明勢如雷霆功在漏刻賊乃悉其精騎以備洄曲之師唐隨帥李愬新總傷痍之軍稍勵奔北之氣城孤援絕地逼勢危而能養貔虎之威未嘗嬰視屈鷺鳥之勢不使露形是以收文城柵而降吳秀琳下興橋而擒李祐果敢多略衆以留之或謂蓄患不利吾軍愬誠明在躬秉信不撓爰命釋縛授之親兵祐感慨之心出於九死縱橫之計果効六奇粵十月旣望陰凝雪飛天地盡閉愬乃遣其將史旻仇良輔留鎮文城備其侵軼命李祐領突騎三千以爲鄉導自領中權三千與監軍使李誠義繼進又遣其將田進誠領馬步三千以殿其後郊雲晦冥寒可墮指一夕卷旆凌晨斬關鋪敦淮潰仍執醜虜雖魏軍得田疇爲導潛出盧龍鄧艾得田章先登長驅綿竹用奇制勝與古爲儔四紀逋誅一朝蕩定攄宗廟之宿憤致黎庶之大安周漢以還莫斯爲盛帝命策勳進弘爲侍中光顏重引竝爲司空愬爲左僕射帥山南東道公武加散騎常侍節制鄜坊丹延道古進御史大夫文通加散騎常侍王師獲金匱之賞環境蒙優復之恩掩骼埋胔除瑕宥罪躋羣生於壽域還比戶於可封東西南北無思不服丞相旋請來朝後加金紫光祿大夫封晉國公乃眷淮潰蒸人生殖俾擇循吏撫其疾傷以宣慰副使刑部侍郎馬總領淮蔡之任天子議功雲臺追美將帥俾

刻金石以揚休勲而百辟僉謀羣帥克讓推義士之志敢貪天功徵賢臣之言實在君德於是縉紳之士暨侯服之臣上獻鴻名式昭徽冊然後光輝千古聲名百蠻詔命掌文之臣文昌勒銘淮浦庶乎闔周雅者美宣王之中興觀劍銘者戒蜀川之恃險銘曰

天有肅殺萬物以成雷風爲令霜雪爲刑君有武節四海以寧陳之原野阻以甲兵在昔聖王格靈邦國武以禁暴刑以助德牧除害馬農去蠹賊苟非戎功孰靜羣慝明明我后神算精微九重獨運千里不違宵衣旰食再安中寓始翦朔漠旋梟蜀鹵丹徒縱導白門縛布服茲四罪豈勞一旅淮南怙亂四十餘年長蛇未翦環境騷然逮於肇章逆志滔天懷柔匪及告諭罔悛帝念生人乃申薄伐飛將鷹揚前鋒電發齊壇命信靈旗指越我武惟揚祇氛未滅集於洄曲一戰摧兇豹備臨晉維留沓中桓桓襄帥奇謀成功浮罌暗渡束馬潛攻合以長圍絕其飛走布穴弋妖升城獲醜商不易肆農安其畝洄曲殘兵投戈束手帝嘉羣帥賞不踰時畫社啟封珪組陸離洎於蠻貊服我英威刻之金石作戒淮夷

幽州紀聖功碑銘

李德裕

幽州盧龍軍帥檢校尙書左僕射張公仲武往年修獻捷之禮今歲有銘勲之請二者君子躋之豈不以諸侯有四裔之功獻其戎捷春秋舊典也宗周納肅慎之貢銘於栝矢天子令德也斯可以爲元侯表可以爲後代法聖上嘉其動而中禮乃命宰臣採其尤功傳於惇史臣德裕敢颺言曰夫兵者所以除暴害也愛人則惡其爲害禁暴則惡其爲亂雖睿智不殺化之以神至德允懷招之以禮然書有奮武之文傳有修刑之訓虞舜四征乃成大功文王一怒以至無侮非德教之助歟仁聖文武章天成功神德明道大孝皇帝熙我大典煥而光明極象外之微臻於至道鼓天下之動致於中和慮必鉤深退而藏密故能神機獨照伐未兆之謀威光遠震制不羈之寇當其時也烽燧迭驚羽書狎至人心大搖羣帥沮氣皇帝以軒后之威神漢高之大略光武之雄斷魏祖之機權合而用之以定王業此議臣之所以延望於清光也倬哉天地應而品物生君臣應而功業成故龍躍而雲從鶴鳴而子和方叔伐玁狁蠻荆來王定遠擊車師西域震服宜有良將殿於朔邊張公禮閱戰器書成傳癖而流落不偶光景未耀明主雅聞奇志持印而拜將軍遙推赤心築壇而命元帥拔自維武授之薊門果能精誠奮發策慮愔意千里獻籌一心憂國則知龍顏善將任人傑而不疑日角好謀

歎敵國而強意回鶻者本北狄之裔也或曰獫狁或曰山戎五帝所不能臣三王所不能制前史載之詳矣暨薛延陀之敗也曾帥吐迷度率衆款塞太宗幸靈武納降立回鶻部落置瀚海都督因我封殖遂雄北方代宗之勘內難也葉護以射鵬之士親扈戎旌亦猶羌髡率師以翼周北貊梟騎以助漢旣滅大憝乃酬厥功特拜葉護司空歲賜絹二萬疋厥後節宗女以配之立宮室以居之其在京師也淫祠雪構甲第棋布棟宇輪奐衣冠縞素交利者風偃挾邪者景附其翎侯貴種則被我文纁帶我金犀悅和音厭珍膳蝸蠹上國百有餘年旣而桀鷲無親天命不祐僭侈極欲神道惡盈本國薦饑畜產耗半黠曼斯因利乘便遂焚龍庭區落蕭條陰燐青熒今之烏介之主亡逃失國竊號沙漠非我冊命自爲假王其來也瀰漫陰山睥睨高闕元塞之下氛霧蔽天質貴主以前驅依大國而求援或丐我米糲救其饑人或邀我甲兵復其故地外雖柔服內有桀心因行人致辭徵呼韓故事願居光祿塞急保受降城其下有二部曰赤心宰相那頡頏特勒赤心者天性忿鷲戎馬尤盛初與名王噍沒斯首謀內附俄而負力怙氣潛圖亂階爲噍沒斯所給誘以俱謁其主戮於帳下其衆大潰東逼漁陽上乃賜公璽書問以方略公以室韋悍極之兵近我邊鄙俾其偵邏且禦內侵尋以

徵役不供爲鹵所敗由是介馬數萬連互幽陵伏精甲於松櫛布穹廬於磧鹵散若飛鳥止如長雲  
火燎於原不可嚮邇公激義氣以虹貫發精誠而石開奇計兵權密授髦雋乃命介弟仲至與裨將  
游奉賓王如清左敵萬李君慶張自榮高守素李志操率銳兵三萬建旆而前介胄雪照戈矛林植  
命以義殉壯由師直聲隆隆而未洩欲逐逐而不食戢以聽命嚴而有威公曰險道傾仄且馳且射  
彼兵所以無敵也致之平原勒以方陣我師可以逞志也於是據於莽平環以武剛首尾虵伸左右  
翼張輕騎旣合奇鋒橫驚如摧枯株如搏畜兔攝讐者弗取陸梁者盡仆虜王侯貴人計以千數然  
後盡衆服聽悉數係纍谷靜山空靡有子遺橐駝馱馱風澤而散旃牆屬幕布野畢收馬牛幾至於  
谷量流血殆同於川決徑路寶刀祭天金人奇貨珍器不可殫諭乃命從事李周瞳馳傳上奉又命  
牙門將周從玘繼獻戎俘皇帝受而勞之羣臣畢賀昔長平七征驃騎六舉竇憲令氏羌之衆陳湯  
檻城郭之兵或生靈滅耗士馬物故或邀功救罪矯命專征然猶告類上帝薦功清廟顧視二漢不  
其愿歟以公威動蠻貊功在漏刻因命公爲東面招撫回鶻使先是奚契丹皆有鹵使監護其國責  
以歲遺且爲漢謀自回鶻嘯聚靡不鳴張公命裨將石公緒等諭意兩部戮回鶻八百人雖介子討